



Gabinete Wever - Croes II

ISLAONLINE


Noticia di Gobierno

2023

Dialuna 3 April 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



CONSEJO DI MINISTER DI REINO A TRATA STRATEGIA DI SIGURIDAD PA REINO COMPLETO

Nos siguridad no ta algo cu ta bin di su mes. E ta rekeri atencion continuo pa percura cu nos ta sigur y cu nos ta sigui sigur. Siguridad den un pais ta hopi importante pasobra sin siguridad, nos no por biba liber. E strategia di siguridad pa Reino Hulandes ta encera locual cu lo haci durante e proximo 6 añanan (2023-2029) na bienestar di siguridad nacional.

Manera cu por tuma nota mundialmente tin cantidad di menasa contra di siguridad, den diferente aea. Tin tension geo politico y menasa militar door di entre otro e guerra na Ukraina. Tin diferente sorto di actividad criminal, pero tambe e pandemia y clima y desasternan natural por conducina desrupcion di sociedad. E strategia di siguridad menciona “Veiligheidsstrategie” ta duna direccion na loke Reino ta haci riba e tema di siguridad nacional.

Menasa contra siguridad no ta haci distincion di frontera, pues Reino Hulandes no ta imuun contra cambianan tumando luga rond mundo. Siguridad nacional ta sinonio cu siguridad internacional y vice versa. Pues e ta sumamente importante cu ta pone enfasis riba siguridad nacional y internacional den e strategia di pa Reino completo y pa conecta esaki na otro. E strategia di siguridad ta combina e asina yama Geïntegreerde Buitenland - en Veiligheidsstrategie (2018) y e Nationale Veiligheid Strategie (2019) hunto y ta contene plan di accion y maneho riba tocante diferente tema.

Siguridad ta un tarea principal di gobierno, pero e ta rekeri ciudadanonan, companianan, organisacionnan y instancianan



tambe, pa traha hunto y pa asina mitiga menasanan contra siguridad, cual ta locual cu e “Veiligheidsstrategie” di Reino ta contene tambe.

Prome Minister Evelyn Wever-Croes:

ANUNCIO WEGANAN ESCOLAR 2023 WE ARUBA

Prome Minister ta felicita Minister Endy Croes, IBISA, stakeholders y tur scol cu ta participa



Diabierna 31 di maart a tuma luga e conferencia di prensa na unda cu a anuncia Weganan Escolar (WE) Aruba 2023 cu ta tuma luga di 26 di mei pa 10 di juni proximo. WE Aruba a wordo lansa pa prome biaha na 2022 cu e vision y determinacion di Minister di Deporte Endy Croes y e ekipo dinamico su tras. Despues di e gran exito di We Aruba 2022, na unda cu durante henter e trayectoria di e weganan, muchanan, maestronan y mayornan tur tawata hopi anima y entusiasmo, awo a anuncia cu lo tin WE Aruba 2023.

Ya tur cos ta cla pa e weganan escolar cuminsa. E seleccionnan ya a tuma luga y e finalnan lo cuminsa dia 26 di mei proximo y esaki, Prome Minister a enfatisa, ta algo cu ta trece hopi alegria di mira cu nos muchanan tin prioridad, deporte tin prioridad. E aña aki, 40 scol a clasifica y ta cla pa duna nan maximo pa e exito di e weganan escolar y e entusiasmo y alegria cu esaki lo trece cu ne. Pa e weganan escolar tur ekipo lo haya uniform.



Prome Minister Evelyn Wever-Croes tawata presente na e ocasion y a felicita Minister Endy Croes y su ekipo cu e anuncio di e di dos WE Aruba.

“Mi ta gradici Minister Endy Croes y e ekipo cu a traha duro pa haci esaki posibel. Mi ta gradici IBISA, stakeholders y tur scolnan cu ta participa y e mayornan cu ta stimula nan yiunan. Cada mucha cu nos por stimula y entusiasmo pa cada deporte y keda den deporte, ta un mucha menos riba caya. Ohala, manera tur deporte ta uni tur hende, e weganan escolar 2023 tambe trece mas union”, Prome Minister a remarca.

Prome Minister ta haci invitacion pa Aruba henter, mayornan muy especial, pa apoya nos muchanan henter e siman aki 26 di mei pa 10 di juni durante e gran campeonato di Weganan Escolar. Prome Minister ta desea tur scol, tur atleta hoben, tur docente y tur mayor, hopi exito den e WE Aruba 2023.

Prome Minister Evelyn Wever-Croes: Prome reunion di Prome Minister na Hulanda, **PROME MINISTER A REUNI NA MINISTERIO DI ASUNTONAN EXTERIOR**

Prome Minister Evelyn Wever-Croes, Minister di Finansa Xiomara Maduro y conseheronan dialuna a yega Hulanda pa un siman di trabou hopi importante pa loke ta trata relacion di Reino. Prome Minister a indica cu Diamars ta un dia importante pa loke ta trata e onderlinge regeling y COHO. Y den e diano siguiente lo tuma luga diferente reunion na unda lo trata temanan entre otro di Raft.

Hunto cu Minister Plenipotenciario na Hulanda, señor Ady Thijsen, a cuminsa atende reunionnan caba na Hulanda. Prome Minister hunto cu señor Thijsen y Directordí DBB, señora Jocelyne Croes, a reuni na Ministerio di Asuntonan Exterior cu Yvette Eechoud, Directeur Directie Westelijk Halfrond (DWH), MinBuza; Dirk-Jan Vermij, Afdelingshoofd, Caribbean en Koninkrijkszaken; Masooma Yousufzai, Beleidsmedewerker Koninkrijkszaken.

Den e reunion aki a delibera extensamente riba e tema di Venezuela. Manera ya conoci, Aruba a duna Venezuela un indicacion cu Aruba ta dispuesto pa habri frontera maritimo cu Venezuela entrante 1 di mei si pa mas tarda 30 di maart, diahuebs ultimo, Aruba ricibi e documentacionnan necesario pa reevalua apertura di e frontera. E documentonan aki a wordo ricibi anochi laat di diahuebs y esakinan ta wordo revisa pa e profesionalnan y den transcurso di siman nan lo indica si e documentonan ta cumpli cu tur requisito cu Aruba tin mester pa asina habri e frontera maritimo.

“Mi ta hopi satisfecho cu Venezuela a cumpli aunke na ultimo minuutnan di e fecha stipula. Aruba y Venezuela ta trahando riba un bon relacion di trabou pa yega na e reapertura di frontera maritimo pa 1 di mei of mas prome si por cu lo duna nos e posibilidad pa importa fruta, berdura, otro comestible y material pa construccion na prijsnan mas barata for di



Venezuela”, Prome Minister a duna di conoce.

A delibera tambe riba otro relacionnan exterior y di Aruba cu paisnan den region. Di parti di esnan di Hulanda, tawata tin hopi elogio pa e forma con Aruba ta desaroya su mes y tambe pa e manera digno cu Aruba ta representa Reino den exterior. “Nan a gradici mi masha hopi mes pa e manera cu mi a representa Reino na Nacionnan Uni como tambe con ami y demas ministernan di Gabinete Wever-Croes, ta representa Reino den exterior pa estrecha lasonan”, Prome Minister Evelyn Wever-Croes a remarca.

Prome Minister Evelyn Wever-Croes:

ACUSACION DI OPONENTENAN CU 3 MINISTER LO TA HAYANDO AUTO NOBO TA COMPLETAMENTE FALSO

"Mi ta lamenta cu oponentenan ta busca forma barata pa kita atencion di pueblo pa cu e bon noticia di firmamento di e onderlinge regeling"



Dialuna mainta via medionan social, Prome Minister Evelyn Wever-Croes a tuma nota di un noticia cu oponentenan a saca, informando pueblo cu 3 minister di Gabinete Wever-Croes lo ta sacando auto nobo. Prome Minister a afirma cu e noticia aki ta uno completamente falso y ta pa desvia e atencion di pueblo for di e bon noticia di e firmamento di e "onderlinge regeling".

Prome Minister a splica cu na momento cu su persona a drenta Gobierno 5 aña pasa, el a haya un auto cu te awe ta sirbi e necesidadnan cu su cargo ta rekeri, y no ta wak niun motibo pa cambi'e. Alcontrario di e Prome Minister anterior, señor Mike Eman cu tabata tin 3 auto den su presupuesto di cual un di nan tabata tin un sticker grandi di AVP riba dje. Esaki, segun Prome Minister, ta bagamunderianan cu a tuma luga den e gobernacion di AVP y a wordo para asina cu Gabinete Wever-Croes a cuminsa goberna.

"Mi a ricibi varios yamada den fin di siman pa adverti mi cu oponentenan lo lanta dialuna mainta cu acusacionnan contra mi persona. Esaki sigur tabata di spera, mirando cu e siman aki ta un hopi importante pa pais Aruba. E firmamento di e "onderlinge regeling" na unda ta

baha e COHO for di mesa, ta un logro grandi pa Aruba. Esaki sigur no ta combini oponentenan y p'esey nan ta prefera di bin cu noticianan falso pa crea discordia y desvia e atencion di pueblo for di e noticia cu si ta positivo y beneficioso pa pais Aruba", Prome Minister a enfatisa.

Oponentenan tambe a bin dilanti bisa cu nan a papia cu ex Secretario di Estado, Raymond Knops. Prome Minister tambe a papia cu señor Knops kende a gradici'e y felicit'e pa cu e logro aki mirando cu e areglo aki di e "onderlinge regeling" ta hopi mas benificioso pa pais Aruba cu esun cu señor Knops a bin cu ne anteriormente.

"Ta importante si pa acusacionnan asina wordo aclarea cu e berdad. Mi kier laga comunidad sa cu e noticia aki, cu oponentenan a trece den medionan social, ta completamente falso. Mi ta lamenta cu oponentenan ta busca forma barata asina, pa purba na sobrepasa e bon noticia cu ta asina importante pa Aruba. Nos den Gobierno a custuma caba di ricibi acusacionnan baho y falso di oponente y ta scoge pa concentra riba e cosnan positivo y no laga nada kibra nos", Prome Minister a expresa.





TA LANSA 'TELEFON PA ADULTO MAYOR' 125 PA COMBATI SOLEDAD



Dialuna 3 di april a lansa e Telefon pa Adulto Mayor cual ta un proyecto colaborativo entre Directie Ouderenzaken y Club Kibrahacha. E liña di telefon nobo di 125 tin como meta pa duna sosten y compasion na esnan di 60 aña bay aruba pa asina combati sentimiento di soledad y isolacion.

Club Kibrahacha tawata brinda sosten telefonicamenye durante e pandemia y awor por reinicia e proyecto danki na Directie Ouderenzaken. Club Kibrahacha lo maneha e telefon di dialuna pa diabierna di 8:30 di mainta te cu 12'or di merdia.

Nos comunidad a bin ta cambiando y desaroyando di tal forma cu ora yega edad di pensioen, ta wordo spera dibo cu bo por bay cas y relaha. E cantidad di yiunan a bira menos, mayoria biaha yiunan ta traha y tambe ta tene nan cantidad di yiunan (esta nietonan) limita. Pues di e forma aki nos tin hopi adultonan mayor cu ta biba den soledad y cu no ta participando activamente den nos comunidad.



E liña di telefon 125 ta crea y ofrece servicio y cuido adapta y na necesidad di nos adultonan mayor y dos pa crea un vision nobo den embehecimento na Aruba. Nos adulto mayornan cu nan conocimiento, experiencia y sabudidura merece di forma un parti clave den nos comunidad. “E Telefon pa Adulto Mayor lo ta un gran ayuda na esnan cu tin mester wordo scucha cu compasion y empatia, den e manera aki ta yuda conecta cu otro. Pues, e slogan “Mi ta Inclui” ta refleha e meta principal di e liña di telefon, esta pa desminui sentimiento di soledad y isolacion bou di adulto mayor.

Minister Arends ta gradici esfuersonan di Directie Ouderenzaken y Club Kibrahacha pa haci e Telefon pa Adulto Mayor un realidad. Por haya mas informacion di e Telefon pa Adulto Mayor na www.mitainclui.aw of riba e facebook na “Mi Ta Inclui”.




MINISTER MADURO TA GRADICI SR. ADI MARTIS PA SU APORTE VALIOSO PA DOCUMENTA E HISTORIA DI NOS PAIS DEN SU BUKI 'HISTORIA DI ARUBA TE CU 1816, DI ISLA RUMAN PA IMPERIUM IN IMPERIO'

Recientemente Minister Maduro di Cultura tabata tin e placer di por a topa y combersa cu e historiado Arubiano dr. Adi Martis kende na aña 2018 a publica e buki 'Historia di Aruba te cu 1816, di Isla ruman pa imperium in imperio.' Den e buki dr. Adi ta describi e storia pre-colonial (2500 v.Chr-1500), e tempo cu Aruba tabata den man di e Spañonan (1499-1634), e periodo cu nos Pais tabata bou mando di e West-Indische Compagnie (1636-1791), y e tempo cu Aruba a sali fo'i dominio di e Inglesnan pa bay den man di e Hulanda (1792-1816).

Den e momento aki cu den Reino Hulandes ta pone atencion

riba e historia y consecuencia di sclavitud den presente, ta importante pa nos na Aruba busca pa haya sa mas di e historia di nos Pais. Door di conoce Aruba su historia, nos por tin miho comprension di nos custumbenan, nos presente, nos por compronde nos relacion den Reino miho y nos por fiha nos futuro. E investigacion y documentacion di dr. Adi sigur ta aporta na nos conocimiento di e historia di nos Pais.

Minister Maduro di Cultura ta gradici dr. Adi pa su tempo, investigacion y documentacion valioso di e historia di nos Pais. Masha danki dr. Adi Martis pa kere den Aruba.



MINISTER MADURO TA FELICITA FAMIA HARMS CU DOS PROYECTO DEN CUAL TA DUNA BALOR NA ARUBA

Un cas Arubiano renoba y bebida traha na Aruba

Diasabra Minister Maduro a pasa admira dos proyecto, Pepe Margo y Calypso, cu ta proyectonan cu e hoben entrepreneur Jonathan Harms hunto cu su Tata Milton Harms a desaroya y den cual nan ta brinda honor na Aruba.


Cas di pepe Margo como destileria di rom artesanal

E cas di e pepe di sr. Milton, sra. Margo Wever den feliz memoria, situa entre Wilhelminastraat y Zuidstraat, a keda transforma den un destileria di rom artesanal cu ta hiba e nomber 'Pepe Margo', na honor di sra. Margo cu a habita e cas. Sr. Milton Harms a conta cu su pepe Margo tabata traha cos dushi y tabata bende esaki fo'i e bentana di cushina cu ta habri riba Wilhelminastraat. E cushina di e cas estilo Arubiano aki cu recientemente a keda renoba den su gloria, awor lo bay conta tambe e storia di e hoben comerciante Jonathan Harms, ya cu ela sa di transforma e cushina den un destileria di rom y a duna e producto local aki e nomber 'Pepe Margo'. Un proyecto bunita den cual ta rescata un di nos casnan estilo Arubiano y ta duna nos localnan y turistanan e oportunidad di mira di cerca e produccion di un rom traha na Aruba.

Bebida Calypso traha na Aruba

Minister Maduro a haci un bishita tambe na e otro proyecto di e hoben entrepreneur Jonathan, cual ta e planta di Calypso cu ta e prome bebida hard seltzer produci na Aruba. Jonathan a transforma e magashina unda cu Famia Harms hopi decada atras a cuminsa cu nan negoshi, den un planta di produccion moderno di un bebida alcoholico di awa carbonisa den cuater diferente sabor. A duna e bebida e nomber Calypso y riba e emblema por mira Aruba su nomber y e Faro di Westpunt.

Minister Maduro ta felicita Famia Harms, specialmente e hoben Jonathan Harms cu e dos bunita proyectonan aki den cual ta duna honor na Aruba. 'E ta un placer pa mira un Arubiano bay dilanti y den e proceso duna balor na Aruba. Masha danki pa kere den Aruba,' tabata palabranan di Minister Maduro na final di su bishita na e dos proyectonan mas nobo di Famia Harms.





UN SIMAN IMPORTANTE Y CU LOGRONAN GRANDI TRAS DI LOMBA

Minister di Turismo y Salud Publico sr. Dangui Oduber ta recapitula riba un siman hopi importante y cu logronan grandi pa pais Aruba.



JAXPORT

E mandatario tabata tin un biahe di trabou pa Jacksonville Florida hopi importante, caminda a firma un MOU entre gobierno di Aruba, Jaxport, Eagle LNG y e estado di Florida. Minister Oduber a duna di conoce cu e MOU aki a keda firma despues di 3 aña y mei cu e negociacionnan ta andando. Minister Oduber a sigui bisa cu e MOU aki ta uno hopi importante pa e oportunidadnan cu Jacksonville ta brinda pa pais Aruba. Awor lo bay sigui traha abase di e MOU aki pa asina logra yega na un "letter of intent" cu Jaxport den futuro cercano. Segun Minister Oduber e biaha di trabou tabata uno hopi exitoso caminda a tene un reunion di mesa rondo. Esaki tabata cu entre otro ehecutivonan di Jaxport, ehecutivonan di estado di Florida y tambe cu e comunidad di comercio. Ya caba a cuminsa traha riba un mision di intercambio entre Florida y Aruba.



ARUBA HAPPY ONE PASS

E siman aki tambe a lansa un otro proyecto di Ministerio di Turismo y Salud Publico, esta e Aruba Happy One Pass. Esaki ta un proyecto di "Seamless Travel", pues biaha sin preocupacion haciendo uzo di credencialnan digital. Esaki a wordo realisa conhuntamente cu e partnernan internacional cu ta SITA y Indicio. Tambe en conjunto cu nos partnernan local cu ta Aruba Airport Authority, Aruba Tourism Authority, Ministerio di Transporte, Ministerio di Husticia y departamento di Imigracion.

E proyecto aki ta bay facilita e biahero/turista Americano masha hopi mes. E ta bay yuda na rebaha e tempo di e trayectoria den nos aeropuerto di momento cu e baha di avion te ora cu e sali di e aeropuerto haciendo uzo di innovacion y tecnologia. E mandatario a duna di conoce cu Aruba un biaha mas ta demostra di ta lider den innovacion mundialmente. Aruba ta e prome pais na mundo cu ta ofrece e servicio aki. Segun Minister Dangui Oduber esaki sigur ta yena su persona cu hopi orguyo y satisfaccion. Aruba un pais asina chikito y liderando mundo den innovacion.



MINISTER ENDY CROES A LANSA WEGANAN ESCOLAR (WE) ARUBA 2023

Cu ta tuma luga di 26 di mei pa 10 di juni proximo



Diabierna atardi, den Conferencia di Prensa di Gobierno di Aruba, na auditorio JFK Education Center, Minister Endy Croes a lansa oficialmente Weganan Escolar (WE) Aruba 2023. Presente na e ocasion special aki tabata: Prome Minister di Aruba sra. Evelyn Wever-Croes, Parlamentarionan di Coalicion, directivanan di scol, instructor y docentenan di deporte y demas invitadonan.

Weganan Escolar 2023 ta un proyecto deportivo cu ta wordo presenta pa Ministerio di Enseñansa y Deporte y IBISA. Un di e metanan di WE Aruba ta pa promove deporte bou di alumnonan di scol preparatorio, basico y secundario. Deporte ta fomenta union, alegria y crea amistad. Tambe deporte ta trece positivismo sin lubida cu e ta sano. Deporte ta e vehiculo pa hiba bo semper riba e bon caminda, deporte ta trece union y deporte ta crea lider.

Weganan Escolar ta un competencia pa alumnonan di scol preparatorio, basico y secundario cu ta competi den seis diferente disciplina e.o. futbol, basketball, volleyball, badminton, functional fitness y beach tennis. E aña aki un bes mas ta tuma luga e competencia di baile deportivo, unda e alumnonan di e scolnan por trece dilanti nan talento y creatividad. E weganen



di clasificacion pa Weganan Escolar 2023 a cuminsa na luna di october 2022 y a finalisa na luna di maart 2023. Un total 975 alumno di 40 scol ta participa na Weganan Escolar 2023:

12 Scol Preparatorio

20 Scol Basico

8 Scol Secundario

E gran apertura di WE Aruba 2023 ta tuma luga na Compleho Deportivo Frans Figaroa dia 26 di mei y ta clausura 10 di juni na Joe Laveist Sport Park na San Nicolas. Dos siman di competencia deportivo y alabes ta invita comunidad di Aruba pa duna sosten y apoyo na nos hobennan.

Durante e conferencia, Minister Endy Croes a duna splicacion amplio di e concepto di Weganan Escolar 2023, di e mascota oficial WIWI cu un bes lo trece ambiente y animo cerca nos hobennan durante cada competencia, como tambe di e uniform cu tur e scol, referee y coach ta ricibi. Mandatario di Deporte a elabora riba e diferente premionan atractivo cu e scolnan ganado ta ricibi, te un cu e premio maximo di 5000 florin. Den e dianan nos dilanti ta sigui brinda mas informacion di WE Aruba 2023.



POTRETNAN DI WEGANAN
ESCOLAR ARUBA 2023



MINISTER ENDY CROES TA ELABORA RIBA DIFERENTE TOPICO IMPORTANTE CU DEA

Siman pasa dialuna, Minister di Enseñansa Endy Croes a reuni cu directora di Departamento di Enseñansa Aruba Sra. Anne Marie Proveyer y directora suplente Sra. Sheila Maduro. Semanalmente ta sinta hunto y ta trata diferente topico importante. Un di e topiconan cu a trata ta e “doorstroomtoets” cu a tuma luga dia 22 y 23 di maart na Aruba pa tur e alumnonan di aña 6 di scol basico. Alrededor di 1500 alumno di diferente scol basico a realisa e evaluacion (toets) aki, incluyendo alumnonan di EduCampus y “homeschooling”.

Ademas di esaki, a dialoga tocante HIAS Aruba, cual ta un organisacion cu ta atende cu personanan indocumenta. Actualmente ta atendiendo un asunto unda cu hobennan cu gradua di scol secundario cu no tin un status legal, no por haya nan diploma. Pues, hunto ta buscando un forma pa soluciona e asunto aki. Fuera di esaki, a dialoga tocante BSN nummer, cual ta un logro grandi pa Aruba. Finalmente, un topico importante cu a trata durante e encuentro ta e Doorlichting Rapport cu dia 31



di maart 2023, manera a acorda cu Hulanda mester a tuma un decision tocante maneho di idioma (taalbeleid). Despues di esaki, ta informa Ministerie van Binnenlandse Zaken en Koninkrijksrelaties (BZK) y Tijdelijke Werkorganisatie (TWO) di Hulanda di e decision final cu a tuma tocante maneho di idioma.

Minister Endy Croes:

PRONTO FLPD TA DEN CONTROL BEK DI LOTERIA ARUBANO Y NOS DEPORTISTANAN TA BAY MIRA FRUTO DI ESAKI

Recientemente, Minister Endy Croes a reuni cu Fundacion Lotto pa Deporte y su conseheronan. Durante e reunion a duna un “update” di FLPD, despues cu a firma e ultimo contract cu Canadian Bank Note (CBN), unda cu FLPD desde aña 2023 lo ta den control bek di loteria su operacion. Den cuadro di esaki, tin diferente aspecto cu mester tuma luga den e lunanan nos dilanti pa e maneho di Lotto pa Deporte por ta den man bek di Aruba, entre otro, documento cu mester pasa via notario, cambio cu mester trece den statuut y asuntonan di banco cu mester aregla. Pues, tin diferente parti cu mester aregla huridicamente ainda y e proceso aki lo tuma algun luna.

A presenta un plan di ehecucion na Minister Endy Croes con ta bay atende cu esaki den e promixo lunanan y tambe duna un calculacion di cuanto tempo e proceso aki ta bay dura. Locual tambe ta di vital importancia ta Jaarrekening 2020 y 2021 cu mester ta cla pa tur e procesonan aki di banco, notario, etcetera, por tuma luga. Un reunion basta largo cu informacion



concreto, basa riba e contract cu a firma, unda cu desde aña 2023 en bes cu CBN cobra un “management fee” di 23.5%, ta bay cobra solamente 8.25%. Pues, pronto FLPD por ta den control bek di loteria Arubano y pronto deporte di Aruba y nos deportistanan ta bay mira fruto di esaki.

Minister Endy Croes: **PRONTO PUEBLO LO MIRA UN GRAN DESAROYO DEN E INFRASTRUCTURA DI FUTBOL DI ARUBA**



Recientemente, Minister Endy Croes a reuni cu Presidente di Arubaanse Voetbal Bond (AVB), Sr. Randolph Lacle y Secretario General di AVB, Sr. Hubert Solagnier. Durante e reunion a dialoga tocante un biahe reciente cu AVB a haci. AVB a caba di regresa di un congreso grandi di FIFA cu a tuma lugá na Africa, unda cu presidente di FIFA a keda reeligi. Ademas, a remplaza FIFA Forward Programme 2.0. pa un version mas nobo. A aproba FIFA Forward Programme 3.0, unda ta bay sigui yuda den inversion di infraestructura deportivo di mas di 200 miembro di FIFA rond mundo.

Manera ta conoci, durante hopi aña AVB tin fondo internacional di FIFA, pero pa motibo cu no ta cumpli cu cierto rekisito cu FIFA

ta existi, no a ricibi e fondonan aki ainda. Durante e congreso aki a yega na un acuerdo mas flexibel pa Aruba, cual dentro di algun luna nos lo bay experiencia. AVB hunto cu stakeholders y Gobierno di Aruba lo bay mira desaroyo hopi bunita den e infraestructura di e deporte di futbol na Aruba. Banda di esaki, FIFA ta contento cu Gobierno di Aruba a inverti den un stadion cu pronto lo keda cla y cu FIFA ta aproba.

Finalmente, e aña aki AVB lo ricibi e fondo cu tabatin stanca durante hopi aña na FIFA, pues tambe nos lo mira hopi desaroyo den e infraestructura di futbol di Aruba den aña 2023 di e fondo aki.



ENSEÑANSA PA EMPLEO EDUCANDO Y FORTIFICANDO CONOCIMIENTO, PA UN DESARROYO LABORAL Y PROGRESO PERSONAL

Recientemente Enseñansa pa Empleo -EPE- a entrega certificado na e cursistanan cu a logra pasa e curso ofreci di Basiskennis Boekhouden y di Ingles pa Principiante, cu exito.

Enseñansa pa Empleo a bin ta recapacita hopi hende desde 1989 tempo cu e proyecto aki di Gobierno di Aruba a inicia cu e fin di yuda nos hendenan cu a perde trabou den tempo di cierre di LAGO, pa por eherce un otro funcion y haya un otro trabou.

Desde e tempo ey, hopi hende cu tabatin e interes di por sigui crece den e mercado laboral, a bin ta haci uzo di servicionan di EPE mediante e diferente cursonan cu EPE ta duna. Nos sa di casonan exitoso unda cu personanan cu a cuminsa den limpieza y mantenimiento, a logra bira telefonista y cu mas recapacitacion di EPE, awor tin años trahando como asistente administrativo. E secreto ta pa keda studia pa amplia bo conocimiento pa por sigui crece laboralmente.

EPE ta un instancia di Gobierno reconoci pa su conocimiento y integridad di cursonan practico ofreci na pueblo di Aruba, na un costo social alcansabel pa mas hopi hende posibel.

Recientemente e cursistanan cu a pasa e curso di Basiskennis Boekhouden -BKB- nivel 1 y 2 cu exito, a ricibi un bunita ceremonia di e instructora Sra. Shareen de Cuba cu pa añanan caba ta e instructora di BKB 1 & 2. Awo, riba peticion popular, instructora de Cuba lo ta ofreciendo e proximo nivel cu ta BKB nivel 3.

Kico ta Basiskennis Boekhouden:

E ta un curso cu ta siña bo con pa maneha administracion di un empresa, duna bo mas conocimiento di accounting como tambe di maneho financiero diario.

Instructora de Cuba cohuntamente cu EPE a haci un yamada na tur e alumno di BKB 2 ultimo y tambe esunnan cu den pasado a pasa e curso aki cu exito, pa sigui amplia su conocimiento cu BKB 3 pa propio reconocimiento na e empresa unda ta labora.



Otro grupo cu a pasa curso cu exito, tabata pa Ingles pa Principiante. E instructora ta Sra. Eslyne Filiciana kende por cierto tambe ta encarga pa duna e hobennan di Formacion Social -SVT- curso di Ingles. Den e mercado laboral di Aruba ta hopi importante pa tin conocimiento di e idioma aki tambe. Otro idioma cu EPE ta ofrece ta Hulandes y nos propio Papiamentu.

Sra. Filiciana pa añanan largo ta encarga cu e curso di Ingles na EPE y e biaha aki tambe cu hopi entusiasmo y orguyo a entrega na e cursistanan e certificado cu nan a studia y traha duro p'e. E instructora a transmiti su conseho na tur, pa continua semper cu capacitacion personal y a invita nan pa inscribi pa e proximo nivel di Ingles.

Minister Glenbert Croes ta felicita tur cursista cu nan logro y tambe e team completo di EPE pa nan dedicacion pa recapacitacion di nos hendenan cu ta desea un miho porvenir laboral pa nan mes.

Cursonan nobo ta cuminsa dia 17 di April proximo. Inscripcion ta habri via website: www.epearuba.com y tambe por pasa na oficina ubica na Engelandstraat 33, na unda ta duna asistencia personal cu registracion.

MINISTER GLENBERT CROES A REUNI CU REPSOL PA INTERCAMBIA VISION RIBA TERENO ENERGETICO



Ta un secreto publico con determina Minister Glenbert Croes ta pa por logra converti Aruba den e hub Energetico pa Caribe, un industria cu lo tin un spin off economico y laboral sin igual pa bienestar di nos Pais, nos Pueblo y di San Nicolas en especial. Un industria cu lo aporta na bienestar di nos pueblo sin contaminacion algun, pa un medio ambiente limpi. Na mes momento lo ta creando cupo di trabou cu e industria nobo aki.

E zona di refineria cu ta uno grandi, lo wordo transforma den e zona di e industria Energia di Aruba consistiendo e.o. di e refineria mes pero operando riba energia limpi. E lo consisti di Aruba Hydrogen Valley cu su “refineria” conoci como electrolizer. Ademá di esaki e produccion di hidrogeno den Aruba Hydrogen Valley lo subasta Aruba cu e energia cu e mester. Tambe lo por almacena hidrogeno cu na su turno por wordo exporta pa otro paisnan den region.

Manera ta conoci EAGLE LNG tambe lo haya su zona den e zona Energetico di Aruba, un proyecto cu ta garantisá reduccion di awa y coriente riba un fuente di energia mucho mas limpi cu HFO – Heavy Fuel Oil. Ademá cu Aruba mester di gas pa e planta di produccion di hidrogeno.

Y asina tin mas proyecto cu lo wordo ubica riba e zona di refineria cu e mandatario na su debido tempo lo anuncia oficialmente.

Den e cuadro aki Minister Glenbert Croes a haci un bishita di cortesía na e compania estatal di petroleo di España cu ta Repsol unda cu a intercambia e maneho, e vision, informacion y conseho riba e plannan ambicioso riba energia sostenibel di e mandatario pa cu Aruba.

E titular di Energia a entrega e plan energetico di Aruba pa cu Aruba Hydrogen Valley y energia sostenibel, un industria nobo



pa e area unda e refineria ta ubica actualmente. Sr. Tomás García Blanco, director general di Exploracion y produccion a expresa di ta impresioná cu un pais asina chikito manera Aruba ya tin su roadmap energetico defini pa futuro y esey ta hopi bon y a felicita Minister y e delegacion pa cu esaki.

Repsol ta conta cu mas di 23 mil trahado y ta presente na mas di 14 diferente pais manera Merca, Canada, Brazil, Bolivia, Colombia, Peru, Venezuela, Trinidad and Tobago, Norwega, Union Britanico, Algeria, Libya y Indonesia.

Exploracion di petroleo y gas ta nan especialidad cual a comberti Repsol den un lider creciente den exploracion na un nivel mundial.

Durante e bishita di e mandatario, Glenbert Croes a ricibi un presentacion riba e drilling y exploracion cu a tuma luga na Aruba, y na final Minister a expresa su gratitud na Repsol pa a kere den Aruba y pa e trabou cu nan a haci na Aruba cu por cierto tabata un inversion di 200 milyon dollar.



Union ta e forsa di un ekipo, famia y
nacion pa logra cada meta pa e
bienestar humano. Ban sigui den
positivismo pa engrandece nos pais.